

Selangor komited bendung Zika

Kerajaan negeri ambil serius biarpun hanya satu kes import setakat ini namun penularannya perlu dibanteras

■ MARLIA ZAKARIA

KLANG- Kerajaan negeri komited membanteras dan memusnahkan nyamuk Aedes serta tempat pembiakannya semaksimal mungkin.

Exco Kesihatan, Kebajikan, Hal Ehwal Wanita dan Keluarga, Dr Daroyah Alwi, berkata, walaupun kini hanya satu kes melibatkan seorang wanita dari Klang disahkan positif virus Zika Ogos lalu, ia tetap dipandang serius.

"Walaupun ia adalah kes import, kerajaan negeri tetap ambil tindakan kawalan dan berjaga-jaga supaya tiada penularan virus itu kepada orang lain.

"Nyamuk Aedes adalah vektor kepada virus denggi, Zika dan Chikungunya. Jadi, matlamat kita musnahkan denggi dan tempat pembiakannya semaksimal mungkin," katanya selepas Program Gotong Royong

Kebersihan Ad-Hoc di lokasi rumah kes mangsa Zika, Taman Botanic.

Dalam program tersebut, Jabatan Kesihatan Daerah (PKD) Klang dan Majlis Perbandaran Klang (MPK) bekerjasama menjejak dan menghapuskan tempat pembiakan Aedes.

"Terima kasih kepada PKD Klang, Jabatan Kesihatan dan Jabatan Perkhidmatan Persekitaran (JPP) dari MPK kerana ambil langkah segera.

"Langkah kawalan dan pencegahan turut dibuat dengan pergi ke rumah-rumah penduduk untuk beri penerangan, edarkan risalah dan racun serangga ke setiap rumah yang dilawati," katanya.

Tambahnya, perkara ini perlu dipandang serius oleh masyarakat khususnya ibu-ibu mengandungi kerana kesannya terhadap kandungan.

"Nyamuk Aedes ni ada dua jenis iaitu dalam dan luar rumah. Di luar, ia tugas jabatan kesihatan dan PKD manakala dalam rumah, tanggungjawab sendiri dan itu penduduk perlu faham.

"Nyamuk ni bijak menyesuaikan diri dengan persekitaran walau sekecil-kecil tempat air bertakung. Paling membimbangkan, jika virus ini dijangkiti ibu-ibu mengandungi," katanya.

Sementara itu, Ketua Penolong Pegawai Kesihatan Persekitaran, PKD Klang, Nor Azam Ashar, berkata, penduduk Klang, Ambang Botanic khususnya diminta beri kerjasama kepada jabatan-jabatan terlibat.

"Tolong beri kerjasama sepenuhnya kepada jabatan yang terlibat menghapuskan Aedes. Ia penting bagi memastikan virus denggi dan zika dapat

dibendung.

"Apabila jabatan kesihatan bekerjasama dengan PKD atau MPK, turun ke muka pintu supaya kerja-kerja pemusnahan dapat dilakukan sepenuhnya di dalam dan luar rumah," katanya.

Katanya, ia berikutan virus Zika kebiasaannya dibawa oleh nyamuk Aedes yang dikenali sebagai Aedes aegypti yang biasa didapati dalam rumah.

"Untuk makluman, virus Zika biasanya dibawa oleh nyamuk jenis dalam rumah, sebab tu kerjasama penduduk sangat diperlukan.

"Pagi dah buat pemusnahan di dalam dan luar manakala petang kita buat semburan.

Kalau kitaran peringkat jentik-jentik dan dewasa dikenal pasti dan dihapuskan, virus ini boleh dikawal," katanya.



Daroyah (kiri) mengedarkan risalah dan racun serangga kepada penduduk Ambang Botanic sambil diperhatikan Adun Sri Muda, Shuhaimi Shafie (kanan).